

Viticulturs grischuns: Di dals tschalers averts

DA GION NUTEGN STGIER / ANR

■ La davosa fin d'emna èn er ils viticulturs grischuns sa participads a l'acziun naziunala. En l'entira Svizra han els avert lur tschalers e quai gia per la 18avla giada. In dals pli enconuschents purs da vin da noss chantun è Gian-Battista von Tscharner. El avain nus visità a La Punt/Rehanau. Il 1999 han intgins viticulturs dal chantun Turgitg l'idea d'introducir in di dals tschalers da vin averts. L'occurrenza ha gi in resun positiv e 17 onns pli tard, la davosa fin d'emna, èn be en la part tudestga da la Svizra sa participads 230 purs da vin a l'acziun dad avrir las portas da lur bains da vin. Dal Lai da Thun fin al Signuradi èn la davosa sonda e dumengia radund 100'000 persunas stadas giasts dals viticulturs ed han retschet infurmaziuns directas da lur vignas, da lur vins e da lur bains da viticultura. Degustà è lura er vegnì e las degustaziuns han testifitgà ch'ils vins svizzers e cunzunt ils grischuns èn oz da qualitat superiura.

Il Grischun, la Burgogna da la Svizra

Il Grischun è en Svizra, cun ina surfatscha da 420 hectaras vigna, bain ina pitschna regiun da vin, persunter ina regiun da «gronds» vins. Tar ils amis da vin vegn il Signuradi, la regiun principala da la producciun da vin en noss chantun, er numnada la Burgogna da la Svizra. L'iva Pinot Noir è cun 76% da la surfatscha da las vits grischunas l'iva principala. Vitiers vegnan anc cunzunt las ivas Riesling-Silvaner, Chardonnay, Sauvignon blanc e 39 autras sortas d'ivas. En il Grischun vegnan producidas per onn radund 2,8 milliuns buttiglias da vin a 7,5 dl u radund 21'000 hl vin. Quai èn tuttina bunamain 15 buttiglias per abitant.



Segna per vin da buna qualitat: la famiglia von Tscharner dal chastè a La Punt/Rehanau: Johann Baptista, Francesca, Anna e Gian-Battista von Tscharner (da san.).

FOTO G. N. STGIER

En il Grischun avain nus radund 70 purs da vin e la gronda part da quels han lur bains da vin e lur vits tranter Panaduz e Maiavilla. In da quels è er *Gian-Battista von Tscharner*, il possessur e chastellan dal chastè a La Punt/Rehanau. El è ina gronda personalitad, ina persona mar-

canta e cunzunt in vignierol cun passiu. Qualitad è la filosofia dal pur da vin che producescha cun ses figl *Johann-Baptista von Tscharner* 19 vins prezius dad 11 differentas ivas. Dapi il 1976 segna Gian-Battista von Tscharner per la producciun da vin da qualitat, autentic e da ferm ca-

racter. Cumenà ha el avant 40 onns cun ina mesa hectara da vits ed oz èn quai 5,3 hectaras (70% Pinot Noir). Da quellas ha el duas hectaras a tschains e las autras èn en ses possess. Oz saja strusch pussaivel da cumprar vits cun esser quellas nunpajablas, ha menziunà Gian-Battista von

Tscharner. En in onn producescha el tut tenor racolta tranter 20'000 e 30'000 buttiglias vin. La gronda part dals clients fidaivels sajan ustarias ed hotels, menziuna il pur da vin e tuttina veda el cun plashair bler vin a persunas privatas.

Er a Favugn ha el ina vit

Cun paucas excepziuns giaschan en il Grischun naginas vits sur 600 m sur mar, ha raquintà Gian-Battista von Tscharner. Uschia è el bunamain il pli «aut» vignierol en noss chantun cun star a La Punt/Rehanau cun ina autezza da 604 m sur mar. Remarcabel è lura er che Gian-Battista von Tscharner è in dals paucs purs da vin che ha er a Favugn ina vit (Hoharai). Favugn è dal reminent en il Grischun l'unica vischnanca da la vart sanestra dal Rain cun vits. Ulteriuras vits ha Gian-Battista von Tscharner a Cuira, Jennins e Maiavilla.

La schelira in grond tema

L'interess per il di dals tschalers da vin averts è er stà grond a La Punt/Rehanau tar Gian-Battista von Tscharner e famiglia. El saja ussa plitost en la segunda retscha cun surdar il manaschi al figl Johann-Baptista von Tscharner, punctuescha il senior vignierol. L'emna passada hajan el ed er il figl gi notgs senza paus pervia da la schelira. Actualmain na vesia dentant betg ora uschè nausch sco temì, ha ditg Gian-Battista von Tscharner. Cunzunt en las vits a Cuira haja el pli grond donn pervia da la schelira e vers 15% da las vignas sajan donnagiadas pervia da las notgs fraidas. Da cumprar chandailas spezialas per proteger las vignas saja betg stà pussaivel cun esser quellas en in culp vendidas, accentuescha Gian-Battista von Tscharner. «Nus avain segà l'erva per che la fradaglia possia curre», menziuna il pur da vin.